



# ILIDŽA

INFORMATIVNI BILTEN OPĆINE ILIDŽA  
Ilidža • Juni 2015 • Broj 139



FESTIVAL FOLKLORA - DJECA SU UKRAS SVIJETA






**REDOVNA SJEDNICA OPĆINSKOG VIJEĆA**


## Vijeće osudilo hapšenje Nasera Orića

Na 29. sjednici održanoj 25. juna 2015. u Multifunkcionalnoj sali Općinsko vijeće Ilidža jednoglasno je podržalo prijedlog šefa kluba vijećnika SDA Nermina Muzura i donijelo zaključak kojim se najoštrije osuđuje postupanje organa Republike Srbije, koji su odlučili da poduzmu krivični progon i raspišu međunarodnu potjernicu za Naserom Orićem građaninom Općine Ilidža i Bosne i Hercegovine, što je imalo za posljedicu hapšenje od organa države Švicarske. Vijeće je jednoglasno da ovakva hapšenja kod građana izazivaju zabrinutost, opću nesigurnost, te zatražilo od nadležnih organa i institucija BiH da hitno poduzmu sve potrebne aktivnosti i zakonom propisane mjere u cilju oslobađanja iz pritvora Nasera Orića i omogućavanje njegovog povratka u BiH.

## Odluka o pristupanju izradi RP

Općinsko vijeće na ovoj sjednici donijelo je i prijedlog Odluke o pristupanju izradi RP "Pejton." Izrada Plana se radi na osnovu inicijative Općine Ilidža u cilju dobijanja detaljnog planskog dokumenta, obzirom da do sada nije rađen, a sve u skladu sa Zakonom o prostornom uređenju i Uredbom o jedinstvenoj metodologiji za izradu planskih dokumenata. Planom je potrebno sagledati prostor prema novonastalom stanju i zahtjevima subjekata planiranja, a u cilju unaprjeđenja prostorne organizacije. Sredstva za izradu Plana će obezbijediti Općina Ilidža u iznosu od 49.800,00 KM iz Budžeta za 2015. i 2016. godinu.

## Nacrt Odluke o izmjenama i dopunama Statuta Općine Ilidža

Općinsko vijeće Ilidža na 29. redovnoj sjednici utvrdilo je Nacrt Odluke o izmjenama i dopunama Statuta Općine Ilidža i upućuje ga na javnu raspravu. Zadužuje se Komisija Općinskog vijeća za Statut i propise da organizuje i provede javu raspravu o Nacrtu, te da istu radi davanja primjedbi, mišljenja i sugestija dostavi službama za upravu, pravobraniocu i posebnim službama, savjetima MZ i političkim partijama. Nacrt Statuta će u toku rasprave biti postavljen na web stranici Općine, te se pozivaju svi zainteresirani subjekti da u pisanoj formi dostave svoje prijedloge, sugestije i mišljenja. Komisija Općinskog vijeća za Statut i propise će Općinskom vijeću podnijeti izvještaj o rezultatima javne rasprave, kako bi Vijeće imalo na dnevnom redu Prijedlog Odluke o izmjenama i dopunama Statuta Općine Ilidža.

## Data saglasnost za provođenje postupka koncesije "Zobov dol"

Općinsko vijeće je jednoglasno usvojilo zahtjev "House Milosa" d.o.o za davanje saglasnosti za provođenje postupka dodjele koncesije na eksploatacionom polju "Zobov dol" i donijelo Odluku o davanju saglasnosti za provođenje postupka dodjele koncesije na navedenom lokalitetu.



## Usvojena Strategija razvoja Općine Ilidža 2014-2020.

Vijeće je usvojilo Prijedlog strategije razvoja Općine Ilidža za period 2014.-2020. godine i prijedlog Akcionog plana za realizaciju Strategije razvoja Općine Ilidža. Strategija razvoja Općine Ilidža do 2020. godine pripremala se i radila prema Metodologiji za strateško planiranje razvoja lokalnih zajednica u BiH. Vodeća načela na kojima se zasniva planiranje lokalnog razvoja jesu održivost i socijalna uključenost, što je sadržano u ovom dokumentu. Načelo održivosti podrazumjeva integrisanost najvažnijih ekonomskih, društvenih i okolišnih aspekata, a zasniva se na ideji da prirodni i ljudski sistemi moraju biti regenerativni (obnovljivi) i uravnoteženi da bi trajali. Ovo je dokument koji treba da bude po mjeri svih građana, a najvažnije snage općine uključuju njen prepoznatljiv identitet, bogatstvo kulturno-historijskog i prirodnog nasljeđa, prirodni kapital - vode (pitke, termalne, mineralne) i očuvan okoliš i prostor za razvoj turizma (Vrelo Bosne, Aleja, Igman, banjska liječilišta, rekreacione zone i šetališta) koje je potrebno iskoristiti, zajednička je ocjena Općinskog vijeća. Stanovništvo Općine ima trend stalnog rasta i izražene vitalne karakteristike stanovništva.

## Usvojen Izvještaj o radu Drugostepene stručne komisije za 2014. godinu

Vijeće je usvojilo Izvještaj o radu Drugostepene stručne komisije za 2014. godinu sa ocjenom stanja i prijedlogom mjera. Komisija je u izvještajnom periodu, a u okviru propisima određenih nadležnosti poduzimala propisane radnje, vodila aktivnosti u cilju rješavanja po žalbama, te u zakonom propisanim rokovima provela žalbene postupke i donijela odluke i riješila sve zaprimljene predmete. U prijedlogu mjera predloženo je da se razmotri nadležnost Komisije i da se pristupi donošenju dopune Odluke o osnivanju stalnih radnih tijela Općinskog vijeća, te da se predvidi nadležnost Drugostepene stručne komisije da odlučuje po žalbama i u slučajevima kada je to predviđeno posebnim federalnim propisima.

## Imenovan novi član komisije Vijeća

Vijeće je na prijedlog OO SBB Ilidža za člana Komisije za prostorno planiranje, mjesne zajednice, komunalne poslove i ekologiju imenovalo Dževada Burazerovića umjesto Remzije Avdibegovića kojeg je Vijeće razriješilo dužnosti.



## Informacije

Nsjednici Vijeća bila je razmatrana i Informacija o stanju vodovodne i kanalizacione mreže na području općine Ilidža koju je Vijeće primilo k znanju kao i Informaciju o implementaciji Projekta stambeno zbrinjavanje Roma u Bosni i Hercegovini. Potpisom ugovora sa korisnicima za pet stambenih jedinica i primopredajom ključeva korisnicima koje je obavljeno 18. decembra 2014. godine ovaj projekat je na području općine Ilidža uspješno realizovan. Donesen je i zaključak kojim se zahtijeva da Policijska uprava Ilidža i JU Kantonalni centar za rad - Služba socijalne zaštite općine Ilidža u saradnji sa Općinom poduzmu potrebne mjere u cilju sprečavanja velikog broja slučajeva prosjačenja Roma što umanjuje ugled i status općine kao atraktivne turističke destinacije. Jedna od informacija na Vijeću je i Informacija o implementaciji Projekta socio-ekonomskog osnaživanja žrtava mina i njihovih porodica. Ovaj projekat koji je pokrenula Evropska Unija u saradnji sa lokalnim vlastima s ciljem zapošljavanja određenog broja ekonomski ugroženih žrtava mina ili članova njihovih porodica kroz obezbjeđenje poslovne obuke i poslovnih grantova. Do sad je na području općine Ilidža realizovano 14 poslovnih grantova čija vrijednost po korisniku iznosi 6.200 KM.

Vijeće je na sjednici primilo k znanju i informacije o stanju komunalnih djelatnosti nad kojima nadzor vrši općinski komunalni inspektor i o praćenju stanja ugroženosti od poplava na svim rizičnim područjima općine Ilidža, kao i Informaciju Agencije za vodno područje rijeke Save o trenutnim aktivnostima na regulaciji rijeke Bosne u Sarajevskom polju.





## Potpisan sporazum „Izmjena drugog dijela fasadne stolarije na Drugoj osnovnoj školi“

Načelnik Općine Ilidža prof.dr. Senaid Memić i direktor Saveza općina i gradova Federacije BiH Vesna Travljanin potpisali su 9. juna 2015. godine u Neumu Sporazum o saradnji.

Općina Ilidža je jedna od odabranih općina po javnom pozivu Savezu općina/gradova koji je raspisan 12. januara za učešće u pilot projektu “Energetska efikasnost u udruženjima općina.”

U okviru Projekta “Energetska efikasnost u udruženjima općina“, koji finansira Njemačko Ministarstvo za ekonomsku saradnju i razvoj (BMZ) i Švajcarska vlada, a provodi Njemačka organizacija za međunarodnu saradnju (GIZ) u saradnji sa Savezom općina i gradova Federacije Bosne i Hercegovine kroz Otvoreni regionalni fond za jugoistočnu Evropu: Modernizacija općinskih usluga (ORF MMS) i Energetska efikasnost (ORF EE), Općina Ilidža izabrana je za finansiranje pilot projekta „Izmjena drugog dijela fasadne stolarije na Drugoj osnovnoj školi u Hrasnici.“ Ukupna vrijednost finansijske podrške u provođenju ovog pilot projekta je bruto 15.000 eura.

Sve aktivnosti trebale bi biti realizovane i završene do 30. oktobra 2015. godine.

## Potpisan sporazum o dodjeli na korištenje i upravljanje fudbalskog stadiona Igman

Načelnik Općine Ilidža prof. dr. Senaid Memić i predsjednik Udruženja FK “Igman” Jakub Viteškić potpisali su u kabinetu načelnika 8. juna 2015. godine Ugovor o regulisanju međusobnih prava i obaveza u vezi sa korištenjem fudbalskog stadiona. Sporazumne strane saglasno su konstatirale da je Općina Ilidža vlasnik novoizgrađenog Komplexa, ulica Hrasnička cesta, koji čine fudbalski stadion sa pratećim objektima, te da se isti daje na korištenje i upravljanje FK “Igman” Ilidža.

“Imamo zajednički interes, a to je razvoj sporta, rad sa mladim i stvaranje uslova za rekreaciju”, kazao je načelnik Memić tom prilikom.

Fudbalski klub “Igman” se obavezao da će Komplex koristiti u svrhu određenu njegovom namjenom, kao i da će obezbijediti namjensko i racionalno korištenje, čuvanje i održavanje. Ugovor je zaključen na period od deset godina.

Podsjećamo, Općinsko vijeće na 28. redovnoj sjednici održanoj 28. maja 2015. godine donijelo je Odluku o dodjeli na korištenje i upravljanje fudbalskog stadiona.



## Potpisan Sporazum o finansiranju projekta škole plivanja

Načelnik Općine Ilidža prof. dr. Senaid Memić i direktor JP “Olimpijski bazen Otoka” d.o.o. Sarajevo Avdija Hasanović potpisali su u Općini Ilidža 10. juna Sporazum o finansiranju projekta škole plivanja za učenike četvrtih razreda osnovnih škola sa područja ove općine.

Općina Ilidža u ovom projektu participira sa 20.000 KM. Cilj projekta je edukacija, odnosno podučavanje djece osnovnim plivačkim vještinama i usavršavanje pravilnog izvođenja plivačkih tehnika za djecu plivače. Časovi plivanja bit će omogućeni za oko 600 učenika.

Načelnik Općine Ilidža prof. dr. Senaid Memić izrazio je zadovoljstvo početkom ove saradnje sa Olimpijskim bazenom koja je usmjerena ka konačnom cilju, a to je da što više osnovaca nauči plivati, a ujedno će to značiti i promociju ovog izuzetno zdravog sporta među učenicima kako bi se nastavili njime baviti, samostalno ili uključivanjem u plivačke klubove.

Direktor Olimpijskog bazena Avdija Hasanović zahvalio se Općini Ilidža i načelniku Memiću za učešće u ovom projektu s nadom da će se uspješna saradnja nastaviti i u budućnosti. Škola će početi u septembru, a trajat će deset časova.





## Potpisani ugovori za dodjelu 45 plastenika

Općina Ilidža kontinuirano podržava razvoj primarne poljoprivredne proizvodnje. Na osnovu Ovo je je naša pomoć i obaveza prema ljudima koji su u stanju socijalne potrebe i neka vam je sa srećom Pravilnika o utvrđivanju uslova, kriterija i postupaka za ostvarivanje prava na dodjelu, a u okviru realizacije projekta „Dodjela plastenika na općini Ilidža“ i ove godine je organizovana dodjela plastenika. Na prijedlog komisije, općinski načelnik je donio odluku o dodjeli 45 plastenika, površine 100 kvadratnih metara sa kompletnom opremom čija pojedinačna vrijednost iznosi oko 3000 KM. Za realizaciju ovog projekta Općina Ilidža je iz budžeta izdvojila 135.000 KM. U sali Općine Ilidža 8. juna 2015. godine, korisnicima su uručeni ugovori o dodjeli i isporuci plastenika.

„Naše opredjeljenje je da je ovo najbolji način da pomazemo građanima, da im omogućimo da sami svojim



radom proizvedu hranu za svoje potebe i da ostvare dodatni prihod, te smatramo da je ovo ulaganje u poljoprivredu korisnije nego neki drugi vid pomoći. Općina od 2010. do sada podijelila ukupno 370 plastenika čija ukupna vrijednost iznosi oko milion KM.“, kazao je načelnik Općine Ilidža prof. dr. Senaid Memić u svom obraćanju dobitnicima plastenika.



## U toku radovi regulacije Tilave

Na području općine Ilidža, tačnije u MZ Butmir u toku su radovi regulacije Tilave. Izvođač radova je firma MGBH d.o.o, a vrijednost 75.800 KM. Radi se regulacija širine šest metara, a dužine 60 metara.

Radove finansira Općina Ilidža, a trebali bi biti okonačni početkom jula.

## Počela izgradnja biciklističke staze na Ilidži

Nakon procedure i odabira izvođača radova koju je provela Općina Ilidža, počela je izgradnja dijela biciklističke staze na Ilidži na potezu od Doma zdravlja Ilidža prema Hrasničkoj cesti - do drugog semafora na Sokolović- Koloniji. Ova faza radova obuhvata izgradnju biciklističke staze u ukupnoj dužini od 3410 metara. Izvođač radova je GRAKOP d.o.o. Kiseljak, a finansijer je Općina Ilidža a nadzor vrši Zavod za izgradnju Kantona Sarajevo.

Vrijednost radova ove faze je 156.000 KM. Biciklistička staza će biti dvosmjerna, a uz nju će ići pješačka staza što će upotpuniti izgled ovog dijela općine, te će promovisati biciklizam kao ekološko prevozno sredstvo. Radovi bi trebali biti okonačni do 8. augusta 2015. godine.







## Prijem za učenike koji su ostvarili zapa`ene rezultate

Načelnik Općine Ilidža prof. dr. Senaid Memić upriličio je prijem 18. juna u Multifunkcionalnoj sali Općine Ilidža za učenike koji su osvojili jedno od prvih tri mjesta na kantonalnom, federalnom i državnom nivou takmičenja. Učenicima je uručio novčane nagrade.

„Ponosni smo na učenike, nastavnike i profesore koji su svojim znanjem, talentom i radom na najbolji način predstavili našu Ilidžu. I ovo je samo mali znak pažnje za vaš trud. Općina Ilidža je jedina u KS koja već nekoliko godina zaredom prati rezultate svojih učenika i u skladu sa svojim mogućnostima ih novčano nagrađuje. Nadamo se da ćete vi svojim znanjem razvijati Ilidžu i našu BiH i da će sistem takvim kao vi davati prednost“ rekao je, između ostalog, načelnik Memić.

„Za kantonalni nivo takmičenja učenici su dobili 120 KM za prvo mjesto, 90 KM za drugo i 70 KM za treće mjesto. Za ova takmičenja nagrađeno je 64 učenika. Za federalni nivo obezbijedene su nagrade za prvo mjesto 140 KM, drugo 100 KM i treće 80 KM. Nagrađena su tri učenika. Za rezultate na državnom takmičenju dodijeljeno je 200 KM za prvo mjesto, 150 KM za drugo i 110 KM za treće mjesto, a na ovom nivou je nagrađeno sedam učenika“, izjavio je pomoćnik načelnika za obrazovanje, kulturu, sport i informisanje Denis Muhović.



## Rekonstrukcija ulica u MZ Butmir, Stup, Osjek, Bla`uj i Rakovica

Završeni su radovi na rekonstrukciji ulice Zbutmirska u mjesnoj zajednici Butmir koja je asfaltirana u širini četiri i dužini 185 metara. Vrijednost radova je 25.500 KM, a investitor je Općina Ilidža. U mjesnoj zajednici Stup asfaltirana je ulica Pijačna u dužini od 185 i širini 3,5 metara u vrijednosti od 21.000 KM, a radove su finansirali Općina Ilidža i građani. Završeni su radovi na asfaltiranju kraka ulice Osik prema pravoslavnom groblju u dužini od 166 i širini tri metra čija vrijednost je 18.000 KM koje je finansirala Općina Ilidža. U toku su radovi u MZ Blažuj na rekonstrukciji ulice Grabovine vrijednosti 89.000 KM u dužini od 1000 metara i ulice Zenik u MZ Rakovica dužine 820 metara i vrijednosti radova 110.000 KM za koje je sredstva obezbijedila Općina Ilidža.



## Svečani prijem za predstavnike Međunarodnog festivala folklor

Udruženje za djecu i mlade "Nominativ" organizovalo je Šesti međunarodni festival folklor za djecu "Djeca su ukras svijeta" koji je održan od 11-15. juna na Ljetnoj pozornici Ilidža. Tim povodom, čelni ljudi Općine upriličili su svečani prijem u Općini Ilidža 12. juna 2015. godine za učesnike festivala.

Goste su u ime načelnika, pozdravili i poželjeli dobrodošlicu Velida Memić, sekretar organa uprave Općine Ilidža i Denis Muhović, pomoćnik načelnika za obrazovanje, kulturu, sport i informisanje.

„Mi smo otvorena općina i sa radošću uvijek dočekujemo goste koji šire svoju kulturu, a istovremeno žele da upoznaju i našu. Kultura je najbolji most povezivanja među ljudima, a izvorna pjesma i igra prezentuju najljepše utiske o nekom narodu. Iskreno se nadam da ćete sa Ilidžance večeras prirediti doživljaj za oči i dušu“ rekla je, između ostalog, Velida Memić.

Na Festivalu su učestvovali folkloriši iz sedam zemalja i to: Albanija, Crna Gora, Mađarska, Bugarska, Srbija, Rumunija i BiH.

„Cilj festivala je okupiti što više djece na jednom mjestu, pod istim krovom i sa istim motom, a to je očuvanje tradicije, razvijanje prijateljstva, kulturnog i socijalnog duha, širenje ljubavi i tolerancije među ljudima“, istakao je Džemo Hurić, direktor Festivala.

Održavanje festivala pomogli su Općina Ilidža i BH Telecom.





## Memorijalno historijski susret „Obrana Donjeg Kotorca”

**M**emorijalno-historijski susret „Obrana Donjeg Kotorca“ i Dan ove mjesne zajednice obilježeni su 13. juna 2015. godine polaganjem cvijeća na spomen-obilježje poginulim borcima, učenjem Fatihe i prigodnim kulturno-umjetničkim programom. Posjetioci su se prisjetili „Prve katoračke bitke“ i presudnih događaja koji su se odvijali na ovim prostorima u toku ratnih godina. Cvijeće su položile delegacije Općine Ilidža, boračkih udruženja, kao i porodice poginulih. Te subote, 13. juna 1992. godine počela je i danima se vodila odlučujuća bitka i ključna odbrana od prvog masovnog napada agresorskih snaga na ovaj dio slobodne ilidžanske teritorije, čijim zauzimanjem bi Sarajevo ostalo potpuno odsječeno i blokirano.

„Prošlo je 23 godine, ali uspomene su ostale i žive. Slabo naoružani, nedovoljno organizovani borci su se oduprli mnogostruko jačem agresoru i uspjeli, kao i mnogo puta kasnije, odbraniti Donji Kotorac. Spremost tada boraca da odbrane svoje domove bila je jača od svega, a poslali su poruku i neprijatelju da neće dozvoliti pokolj, paljenje i oduzimanje njihovih domova, njihove Bosne. Našoj Bosni mnogi su pokušali uzeti ljepotu i dušu, ali nisu uspjeli- nismo im dali niti ćemo dati. Sva loša vremena su iza nas, treba koračati naprijed u nove pobjede. Nikad nećemo zaboraviti šta je bilo, ali idemo dalje ponosno. Mlade treba podsjećati šta se dogodilo ali i da budu uzdignutih glava, jer mnogo ljudi se borilo za slobodu naše domovine, neki, nažalost, nisu više ovdje među nama, ali mi ćemo ih uvijek pamtit i po njihovoj hrabrosti, žrtvi. I zbog toga mi ne smijemo dozvoliti da se zaboravi prošlost. Sada je nebo nad Bosnom plavlje, a na horizontu sunce jače sija svom svojom ljepotom i ukazuje na nezaboravne trenutke koji su bili a i bit će. Velike zasluge za odbranu od tog napada pripadaju mladom oficiru, komandiru čete Nedžad Deliću i Bajramu Hasanoviću koji su herojski dali svoje živote i uspomene na njih će se i dalje njegovati“ poruka je sa ovog skupa.

Susret je organizovala Općina Ilidža, Četvrta viteška i JOB Unija veterana.



## Godišnjica Podru`nice 10 ^etvrte viteške motorizovane brigade

**U**ruga godišnjica Podružnice 10-Četvrte viteške motorizovane brigade Butmir obilježena je nizom kulturno-sportskih aktivnosti. Stanovnici slobodnih teritorija Ilidže koji su živjeli 1992. znaju i pamte da je zaslugama Četvrte viteške brigade kasnije preimenovane u 104. Vitešku motorizovanu brigadu uspostavljena stabilna linija fronta prema neprijatelju, a osiguran i normalniji život. Nastala je iz naroda koji se goloruk organizovao po ulicama, mjesnim zajednicama, kasnije i štabovima. Predsjednik Podružnice 10-Četvrte viteške brigade Izet Hurić istakao je da obilježavanje ovakve godišnjice mora postati obaveza, prioritet i tradicija. U Osmoj osnovnoj školi „Amer Čenanović“ održan je historijski čas, a učenici o temi „Ljiljan a to znači“ likovnim prikazom željeli su reći šta je to. Najbolji rad nacrtala je Emina Jelešković, Abdulah Vlahovljak je bio drugi a Sadžida Gadžo treća. Održan je i turnir u fudbalu. Nagrađeni su peharima VIII-3, drugi su bili IX-1, a treći IX-2. Održan je i turnir u šahu za veterane. Džeko Škrijelj je bio najbolji, drugoplasirani Faruk Tahirović, a Kemal Bajramović treći. Održan je i turnir za veterane između podružnica. Najbolji su bili momci iz Četvrtog motorizovanog bataljona, drugi iz Minobacačke čete, a treći iz Čete vojne policije. Obezbijedene su i novčane nagrade za njih. Prvoplasiranim 200 KM, drugoplasiranim 150, a 100 KM trećeplasiranim. U povodu obilježavanja druge godišnjice Udruženja podružnice 10-Četvrte viteške motorizovane brigade Butmir 13. juna održana je i svečana akademija ispred Osme osnovne škole „Amer Čenanović.“ Akademiji je prisustvovao i komandant Četvrte viteške motorizovane brigade general Fikret Prevljak koji je još jednom podcrtao značaj obilježavanja, koji ima za cilj nikad ne zaboraviti šta se dešavalo 1992-1995. Husein Hasibović, nekadašnji komandant Odreda Butmir i zamjenik predsjednika Udruženja Četvrte viteške motorizovane brigade uručio je zahvalnice za odbranu slobodnih teritorija: posthumno Hajrudin Klepo, Nedžad Delić, Bajram Hasanović, Abdulah Kubat i Reuf Kučuković, te JU Osma osnovna škola „Amer Čenanović“.

Hurić je zahvalio svima koji su pomogli obilježavanje ove godišnjice: Općini Ilidža, kompanijama Butmir d.o.o., Sara Company, Euro-asfaltu, Stambolić d.o.o., Klima centar, STR Lužani, KUD „Ekrem Mujkić“, Lužani TR Mini market, te učenicima i nastavnicima Osme osnovne škole „Amer Čenanović.“





## Obilje`en dan kada se pokušala deblokirati Rakovica

JOB Unija veterana, Udruženje boraca „Veterani rata 1992-1995. Rakovica“ i Općina Ilidža 5. juna su organizovali memorijalno-historijski susret Akcija-pokušaj deblokade Rakovice i Dan MZ Rakovica. Ispred spomen-obilježja u Rakovici delegacije ovih udruženja, Općine Ilidža i građani položili su cvijeće i odali počast svim poginulim borcima ovog naselja.

Prisutni saborci evocirali su uspomene na taj dan, a učenici Devete osnovne škole izveli su prigodan kulturno-umjetnički program. Predsjednik Udruženja boraca „Veterani rata 1992-1995. Rakovica“ Edin Lakača kazao je da su tog dana prije 23 godine borci slabo naoružani, ali sa velikom željom da vrata svoja ognjišta, pokušali da od agresora oslobode Rakovicu. Međutim, agresorske snage su bile nadmoćnije, tako da pokušaj deblokade Rakovice nije uspio.

„ Akcija je dobro krenula, međutim izostala je koordinacija jedinica sa područja Kiseljaka i Visokog. Napravili smo početni uspjeh, zadržali se tu nekoliko sati, ali je neprijatelj dobio pojačanje sa Ilidže tako da tu više nismo mogli ostaniti i vraćeni smo na početne položaje. U toj akciji poginulo je 12 ili 13 naših boraca, a nekoliko ih je ranjeno“, kazao je Lakača.

Hajrudin Čebirić učestvovao je u akciji deblokade ovog naselja. Prisjetio se šta se tog dana dešavalo.

„ U četiri sata ujutro 6. juna 1992. godine, sa prostora Koščana krenula je jedinica u kojoj sam se i ja nalazio. Imali

smo tri pravca, jedan je bio Kobiljača, drugi Rudnik, a treći Šamin gaj. Na ta tri pravca bilo je raspoređeno 120 boraca. Zadatak je bio da se dođe u šest sati na određene položaje što smo i uradili. Čekali smo na tim položajima akciju sa prostora Visokog, međutim zbog slabe koordinacije između jedinica, jer nije bilo sistema veza, izostala je pomoć sa tih prostora tako da smo se u kasnim popodnevним satima, pod jakim dejstvom neprijatelja, morali povući. Što se tiče nas mi smo uradili šta je bilo planirano, međutim nije bilo koordinacije između ostalih jedinica“, rekao nam je Čebirić.

## Obilje`ene 23 godine HVO-a

Udruga organizatora otpora, umirovljenih i demobiliziranih branitelja Hrvatskog vijeća obrane (HVO) Sarajevo u Domu oružanih snaga BiH 1. juna je upriličila akademiju u povodu obilježavanja 23. godišnjice utemeljenja HVO-a Sarajevo.

Učesnici skupa su odali počast poginulim i preminulim pripadnicima HVO-a Sarajevo, kao i svim žrtvama agresije na Bosnu i Hercegovinu, prisjećajući se boraca koji su živote položili na oltar domovine i za slobodu svih građana Sarajeva.

Manifestaciji je prisustvovao i načelnik Općine Ilidža prof. dr. Senaid Memić koji je čestitao godišnjicu i u svom govoru istakao važnost HVO-a u odbrani BiH.

Sretko Tomić, predsjednik HVO-a Ilidže uručio je zahvalnice načelniku Općine Ilidža prof. dr. Senaidu Memiću, Mirsadu Sinanoviću, pomoćniku načelnika za boračka pitanja, te Zoranu Bošnjaku i Esadu Deliću-Deli.



Predsjednik RVI Ilidža Esad Delić je istakao da borci Ilidže neće da budu paraziti, već hoće da rade, zarađuju i hrane svoje porodice i da su svoju šansu prepoznali u poljoprivredi i iskazao namjeru da će sa zadrugom „Veterani“ koju su zajednički osnovali nekadašnji pripadnici Armije RBiH i HVO-a Sarajevo vrlo brzo aplicirati na sredstva iz Evropskih IPA fondova.



## Odr`ano savjetovanje o osnivanju bora~kih zadruga

U sklopu izrade strategije zapošljavanja pripadnika boračke populacije Ministarstvo za boračka pitanja Kantona Sarajevo u saradnji sa boračkim udruženjima 11. juna 2015. godine u prostorijama RVI Ilidža (Restoran bazeni) organizovalo je savjetovanje o temi „Osnivanja boračkih zadruga“. Savjetovanju su pored ministra za boračka pitanja Muharema Fiše, prisustvovali federalni ministar za pitanja boraca i invalida odbrambeno-oslobodilačkog rata Salko Bukvarević te predstavnici svih kantonalnih i općinskih boračkih organizacija, braniteljskih zadruga „Domovina“ iz Mostara i „Eko Konavle“ iz Čilipa (Hrvatska), te Savez brigadnih udruženja Prvog korpusa Armije RBiH Kanton Sarajevo, „Eko-San“ i zadruga „Prva boračka plodovi Bosne“.

„Osnivanje zadruga je dobar način organizovanja i šansa za zapošljavanje boračke populacije koje će pored ekonomske koristi biti važne za resocijalizaciju ove ranjive populacije“, kazao je Zdenko Marković predsjednik Udruge dragovoljaca i veterana HVO Sarajevo.





## Podijeljeno 10 paketa

U povodu mjeseca Ramazana firma Semerkand d.o.o je podijelila 10 paketa porodicama slabijeg imovnog stanja sa područja Ilidže. U paketima s hranom se nalaze najpotrebnije namirnice kako bi tokom ovog mjeseca posta sugrađani slabijeg ekonomskog stanja na svojoj trpezi mogli imati kvalitetniji obrok.

Podjela je realizirana putem Službe za rad, socijalna pitanja, zdravstvo, izbjegla i raseljena lica.

## Konferencija mladih Crvenog križa

U periodu od 11. do 14. juna 2015. godine održana je Senaesta konferencija mladih Crvenog križa Općine Ilidža. Konferenciji su prisustvovali gosti iz organizacija Crvenog križa u BiH i van naše zemlje: CK Osijek, CK Zenica, CK Kiseljak, CK Tešanj, CK Prijedor, CK Fojnica, CK Istočna Ilidža, CK Kakanj, općinske organizacije Crvenog križa Kantona Sarajevo (Centar, Novo Sarajevo, Ilijaš, Vogošća, Stari grad), kao i predstavnici udruženja Mreža vršnjačkih edukatora „Y Peer“, Partnerstvo za zdravlje, Vijeće mladih Ilidža, Odred izviđača Igman 92.

Gosti Konferencije su 12. juna 2015. godine imali priliku da sa volonterima CK Ilidža vrše podjelu hrane na punktu javne kuhinje, posjete nekoliko građana treće dobi koji su u stanju socijalne potrebe, te im uručili pomoć.

Mladi CK učestvovali su i na sajmu koji je organizovan povodom Dana mladih, na kojem su predstavili aktivnosti CK Ilidža. Na zvaničnom dijelu Konferencije na kojem je predstavljen izvještaj o radu mladih CK Ilidža za period januar 2014.- juni 2015. predstavljen je film "Poplave, maj 2014", filmovi o projektima međunarodne saradnje sa Crvenim krstom Beograd - Palilula i CK Gornja Austrija - Lambach, te video kojim je predstavljena reprezentacija BiH za Evropsko takmičenje iz pružanja prve pomoći - Rumunija 2015. Uručene su zahvalnice za saradnju gostima, udruženjima, sponzorima te partnerima.



## Uspješno izvedena pokazna vježba evakuacije

U skladu sa planom zaštite od požara Općine Ilidža, Služba civilne zaštite u saradnji sa Službom za zajedničke poslove 18. juna 2015. godine uspješno je izvela pokaznu vježbu evakuacije i spašavanja uposlenika. Članovi Civilne zaštite pokazali su da su spremni pomoći u spašavanju ljudi u nepredviđenim situacijama poput požara.

"Vježba predstavlja kolektivnu spremnost da ukoliko se nađemo u ovakvim situacijama pridemo vrlo odgovorno određenim izazovima kao što su incidentne situacije koje se mogu dogoditi svaki dan. Vježba je uspješna jer je kolektiv pokazao odgovornost, a veliku zahvalnost dugujemo i našim strankama koje su se nalazile u zgradi i koje su pristupile pokazanoj vježbi" izjavila je Mira Boras pomoćnica načelnika za civilnu zaštitu.

Simuliran je požar u kotlovnici općinske zgrade s prijetnjom njegovog širenja u garažu i prostorije magacina. Nakon provjere mjesta nesreće, obaviješten je načelnik prof. dr. Senaid Memić o incidentu i pristupanju evakuaciji prisutnih u zgradi.

Odmah po oglašavanju alarma svi vozači su sa vanjske strane (s parkinga) ušli u garažu i hitno izvukli vozila na parking općine, a svi uposlenici su odmah napustili prostorije u kojim se nalaze, ponijeli lične stvari, čime su pokazali savjesnost i ozbiljnost.



## U aprilskom roku upisano 596 prvaka

U aprilskom upisnom roku za školsku 2015/2016. u prve razrede 11 osnovnih škola na području općine Ilidža upisano je 596 učenika, od toga 299 dječaka i 297 djevojčica.

Najviše je upisano u Sedmu osnovnu školu njih 76, zatim u Drugu osnovnu 75, Petu 74, Treću 72, Prvu 64, Desetu 47, Devetu 43, Šestu 54, Osmu osnovnu školu "Amer Čenanović" 42 i Četvrtu 24 učenika. U osnovnu školu El-Manar u aprilskom roku upisano je 25 prvaka.







## I cekerima ~uvamo svoju sredinu

Uspješno je realizovan još jedan projekat Ekološkog udruženja „Aleja“. Aktivisti su 13. juna u Maloj Aleji na Ilidži podijelili građanima 100 cekera i 200 letaka edukativnog sadržaja. Projekat je postao tradicija i već treću godinu realizuje se na području općine Ilidža.

„Cilj projekta je da se iz upotrebe izbace plastične kese, koje su u većini zemalja EU zakonom zabranjene za upotrebu. Plastične kese se prave od sirovina kao što su ugalj, zemni gas, nafta i druge štetne sirovine. Proces razgradnje plastičnih kesa traje i do 400 godina. Nadamo se da ćemo kroz ovaj projekat podstaći građane da plastične kese zamijene cekerima, te na taj način dati svoj doprinos u očuvanju prirodnog okruženja naše općine“ kazao nam je Edin Muminović iz Ekološkog udruženja „Aleja.“ Aktivisti Ekološkog udruženja „Aleja“ 30. maja 2015. godine u okviru aktivnosti za 2015. godinu realizovali su projekat zasađivanja sadnica. Projekat je realizovan u haremu novosagrađene džamije u Mjesnoj zajednici Hrasnica I, gdje su ovi mladi ljudi zasadili značajan broj sadnica raznih vrsta voćki. „Aleja“ će nastaviti svojim aktivnostima doprinositi u poboljšanju društveno-kulturnog života u našoj lokalnoj zajednici.

## Odr`ana biciklijada u Velikoj aleji

U Velikoj aleji 5. juna održana je biciklijada, koja se odvijala od parkinga na početku Aleje do izvorišta Vrelo Bosne i nazad. Biciklijada je organizovana u sklopu obilježavanja Svjetskog dana zaštite okoliša, a u njoj je učestvovalo oko 200 učenika iz ilidžanskih osnovnih i srednjih škola.

Biciklijada je postala tradicionalna jer se već petu godinu organizuje povodom obilježavanja Svjetskog dana zaštite okoliša.



## Dan mladih-Zabava za sve generacije

Djevojčice iz dječijeg hora Princess krofne, pjesmom su otvorile jubilarni deseti Dan mladih Općine Ilidža.

Obrazovno rasonodni centar za mlade Spajalica čiji je osnivač Institut za razvoj mladih KULT, odjekivao je 13. juna dječijim osmjesima i grajom. Mališani su se okušali u raznim sportskim aktivnostima, a oni najmlađi, polaznici Škole prijateljstva, uživali su u crtanju i dječijim igricama.

„Sretni smo što je Spajalica mjesto susreta djece i mladih sa područja općine Ilidža, ali i cijelog Sarajeva. Volonteri Instituta za razvoj mladih KULT zaista su se potrudili da ovaj dan ostane u dugom sjećanju mladima. Osmjesi na licima prisutnih najbolja su potvrda da će tako i biti“ - izjavila je Abela Purivatra, saradnica za odnose sa javnostima Instituta za razvoj mladih KULT.

Dan mladih objedinio je dječiji program, sajam nevladinih organizacija, nogometni turnir za mlade i DJ Party. Kompletnu manifestaciju organizovali su volonteri Instituta za razvoj mladih KULT, uz podršku Općine Ilidža.



## “@ena si mo`eš sve”

Vijeće mladih Ilidža je u saradnji sa Općinom Ilidža realizovalo projekat pod nazivom „Žena si, možeš sve“ čiji je cilj bio proširiti svijest o problemu neravnopravnosti spolova i nasilja nad ženama među mladim ljudima u ovoj općini.

Projekat „Žena si, možeš sve“ realizovan je u periodu od 22. do 24. maja 2015. godine. Vijeće mladih je, uz sredstva koja je obezbijedila Općina Ilidža, nabavilo sav potreban materijal za održavanje radionica, angažovalo edukatore/predavače ali i svoje volontere koji su se aktivno uključili u realizaciju projekta, te obezbijedilo hranu i piće za sve učesnike kao i prigodne poklone.

Govorilo se o temi ravnopravnosti spolova gdje su kao predavačice bile angažovane stručne edukatorice. Svi prisutni su aktivno učestvovali u razgovoru, postavljali pitanja, razmijenili iskustva i ostvarili neka nova poznanstva koja će im biti od koristi u budućem radu.







## Završen Treći memorijalni turnir Josip Katalinski Škija

Na stadionu u Doglodima 13. i 14. juna 2015. godine održan je Treći memorijalni turnir Josip Katalinski Škija. U kategoriji cicibana najbolji je bio NK Željezničar, drugi su bili FK Sarajevo, a treći ŠN Romari (Vitez).

U kategoriji pjetlića prvi su bili ŠF Šampion (Sarajevo), zatim FK Dar (Sarajevo) i treći NK CIM (Mostar).

Za najboljeg golmana u kategoriji cicibana proglašen je Faris Mehić (FK Sarajevo), najboljim igračem Amer Bašović (FK Željezničar), a najboljim strijelcem Joško Garić (ŠN Romari).

Najbolji golman u kategoriji pjetlića je Benjamin Čorbo (ŠF Šampion) najbolji igrač je Aner Alagić (FK Dar), a najbolji strijelac Ajdin Drina (ŠF Šampion).

Diploma Akademije nogometa "Josip Katalinski Škija" za igrača koji svojom igrom najviše podsjeća na Josipa Katalinskog Škiju dodijeljena je igraču Josipu Knezoviću iz NK CIM iz Mostara. Diplomu je uručila Jasna Katalinski i Nikola Grujić najmlađi član Akademije nogometa Josip Katalinski Škija.



## Ramazanski paketi za posta~e

Povodom mjeseca Ramazana Udruženje boraca „Prva samostalna brigada Stup“ Ilidža obezbjedilo je 100 paketa sa hranom za postače pripadnike brigade i članove njihovih porodica sa područja mjesnih zajednica Stup II, Stup, Stupsko brdo i Otes. Paketi su vrijednosti oko 50 KM, a doniralo ih je Udruženje za blagostanje iz Sarajeva. Podjela je obavljena 17. juna 2015. godine ispred prostorija Mjesne zajednice Stup II. Ovo je još jedna u nizu akcija pomoći stanovnicima ovih područja.



## Festival folklor „Djeca su ukras svijeta“


Udruženje za djecu i mlade NOMINATIV je i ove godine organizovalo, već tradicionalni, Šesti međunarodni dječiji festival folklor „Djeca su ukras svijeta“ koji je održan od 11. do 15. juna 2015. godine na Ljetnoj pozornici na Ilidži. U tri festivalske večeri mnogobrojnoj ilidžanskoj publici su se predstavili dječiji ansambli iz Albanije, Bugarske, Crne Gore, Rumunije, Mađarske, Srbije i Bosne i Hercegovine sa više od 500 učesnika koji su izveli tradicionalne igre iz zemalja i gradova iz kojih dolaze. U ime Općine Ilidža, jednog od pokrovitelja festivala, te u ime općinskog načelnika prof. dr. Senaida Memića učesnike i prisutne je pozdravio pomoćnik načelnika Denis Muhović i zaželio im dobrodošlicu i ugodan boravak na Ilidži. Prisutnima se obratila i Anka Raić ispred CIOFF-a BiH (Međunarodni savjet organizatora festivala folklor i tradicionalne umjetnosti u BiH) koja je naglasila da je ovaj festival uvršten na CIOFF-ovu listu najpoznatijih festivala dječijeg folklor u svijetu. Festival je otvorio direktor Džemal Hurić koji je pored dobrodošlice gostima kazao da im je zajednički cilj očuvanje tradicije, razvijanje prijateljstva, širenje ljubavi, tolerancije i mira među djecom. Za učesnike festivala vrijedni domaćini su organizovali obilazak grada Sarajeva, kupanje na Termalnoj rivijeri, vožnju fijakerom i obilazak Vrela Bosne. Pored Općine Ilidža pokrovitelji i sponzori festivala bili su i BH Telecom i Grad Sarajevo.

## Ilidžanci u`ivali u predstavi „Cosa Nostra“

U organizaciji Općine Ilidža 1. juna u Multimedijalnoj sali odigrana je pozorišna predstava „Cosa Nostra“.

Komedija „Cosa Nostra“ je duhovita priča o neobičnom susretu dvije potpuno različite žene Gabrijele i Marlene u nsvakidašnjem ambijentu i spoznaji da su u ljubavnom trokutu s istim muškarcem. Traje borba kome će on pripasti, mijenjaju se sredstva, smišljaju strategije. Na kraju od ljutih rivalki njih dvije postaju najbolje prijateljice.

U predstavi koja je nastala u koprodukciji Udruženja Umjetnička grupa „SATYA“ i Centra za kulturu „Sarajevo“ igraju Minka Muftić i Belma Košutić. Ulaz je bio besplatan.





# Juniorke Igmana treće u dr`avi



**N**a nedavno održanom završnom finalnom turniru za prvaka Federacije BiH koji je održan u Odžaku, juniorke Ženskog odbojkaškog kluba „Igmansko Brčko“ zauzele su drugo mjesto i tako izborile plasman na završni turnir za prvaka Bosne i Hercegovine za koji će se boriti četiri najbolje ekipe u državi. Ovaj rezultat je jedan od najvećih uspjeha u novijoj istoriji kluba. Na

završnom turniru koji je održan 6. juna u KSC Ilidža i dvorani u Lukavici u Istočnom Sarajevu učestvovala su juniorske ekipe Bimal-Jedinstva iz Brčkog Smeča iz Lukavca i ekipe domaćina, Igmana i Slavije. Mlade odbojkašice Igmana su na turniru osvojile treće mjesto u BiH i tako postigle jedan od najznačajnijih rezultata u novijoj istoriji kluba.